

आकाशवाणी जयपुर—अजमेर  
प्रादेशिक समाचार।

दिनांक 20.05.2024

समय: 18.45 बजे

- शाहपुरा ज़िला रा कोटड़ी मांय एक टाबरी सागे यौन दुराचार कर र वां ने जीवती बाल्द देवण रा मामला मांय दोषी दो जणां ने फांसी री सजा सुणायी ज्यी।
- राजस्थान माध्यमिक शिक्षा बोर्ड री 12वीं कक्षा रा सगळा संकायां रा नतीजा रो ऐलाण—कॉर्मसर्स मांय सब ऊं बत्ता करीब 99 फीसदी विद्यार्थी पास व्हया।
- लोकसभा चुणाव रा पांचवां दौर मांय 49 सीटां माथे शांति सागे वोट पड्या।
- राज्य मांय घणखर ठौड़ां पारो 44 ऊं 47 डिग्री सेल्सियस बीचे दर्ज करी ज्यो—केई ठौड़ां रात री बगत ई तेज़ गर्मी।

000

शाहपुरा ज़िला रा कोटड़ी थाना हलका मांय 2 अगस्त 2023 ने बकरियां चरावण सारू गयी नाबालिग टाबरी ने कई जणां कानी ऊं यौन दुराचार पाछे जीवती ई कोयलो बणावण री भट्टी मांय बाल्द देवण रा मामला मांय भीलवाड़ा री पॉक्सो मामला री अदालत दो अपराधियां ने मौत री सजा सुणायी है। मामला मांय सात और आरोपितां ने अदालत बेकसूर करार दीना। विशेष लोक अभियोजक महावीर किसनावत बतायो के ई मामला मांय सरकार री ओर ऊं 43 गवाहां रा बयान करायी ज्या। अदालत रा फैसला माथे संतोष जताता थकां टाबरी रा पिरवार वाळा कहयो के ऐड़ा फैसला ऊं टाबरियां सागे ज्यादती री वारदातां नी व्हेला।

.....  
000

मुख्य सचिव सुधांश पंत री सदारत मांय आज जयपुर मांय इंटर—ऑफरेबल क्रिमिनल जस्टिस सिस्टम 2.0 लागू करण रा बारा मांय बणायी ज्यी राज्य स्तर री समिति री मीटिंग राख्यी ज्यी। मीटिंग मांय मुख्य सचिव कहयो के ई साल राजस्थान मांय ई—अभियोजन, ई—जेल अर क्राइम अर क्रिमिनल ट्रैकिंग नेटवर्क सिस्टम रा हलका मांय दूजा राज्यां री तुलना मांय बेहतर काम व्हयो है। आईसीजेएस 2.0 रो मकसद आपराधिक न्याय प्रणाली रा पांच खम्भां पुलिस, ई—अभियोजन, ई—जेल, ई—न्यायालय अर ई—फोरेंसिक ने मिला र जाणकारियां एक—दूजा ने मुहैया करावणो है।

00000

सुप्रीम कोर्ट भारतीय दंड संहिता, आपराधिक दंड संहिता अर साक्ष्य कानून री ठौड़ बणायी ज्या तीन आपराधिक कानूनां रे खिलाफ दायर एक जनहित याचिका माथे विचार करण ऊं नट ग्यो है। न्यायमूर्ति बेला एम त्रिवेदी अर न्याय मूर्ति पंकज मित्तल री अवकाश पीठ कहयो के अर्जी घणी ही अनौपचारिक अर लापरवाह तरीका ऊं दायर करी ज्यी है। जनहित याचिका मांय भारतीय न्याय संहिता, भारतीय नागरिक सुरक्षा संहिता अर भारतीय साक्ष्य अधिनियम मांय कई खामियां व्हेवण री शिकायत करी ज्यी ही।

000

दौसा जिला रा संवासा गांव कने दिल्ली—मुंबई एक्सप्रेस वे माथे आज तीन ट्रकां री टक्कर मांय दो जणां री मौके ई मौत व्हे ग्यी अर दो जणा घणा ज़ख्मी व्हे ग्या। ज़ख्मी लोगां ने लालसोट जिला अस्पताल ले जायी जया, जठे ऊं वां ने जयपुर रैफर कर दिया ज्या। नेशनल हाई—वे नंबर 21 माथे व्हया एक और हादसा मांय मानपुर चौराहा कने एक बेकाबू ट्रेलर री फेंट मांय आ जावण ऊं एक जणा री मौत व्हे ग्यी। दिल्ली—मुंबई एक्सप्रेस वे माथे व्हया एक और हादसा मांय अलवर ऊं दौसा ओड़ी जा रही एक कार रैणी थाना हलका मांय बेकाबू व्हे र डिवाइडर ऊं टकरा ग्यी। हादसा रे कारण कार मांय सवार 5 जणा ज़ख्मी व्हे ग्या, ज्यां मांय ऊं घणा ज़ख्मी व्हया एक ही पिरवार रा दो जणां ने जयपुर रैफर कर दिया ज्या।

00000

राजस्थान माध्यमिक शिक्षा बोर्ड सीनियर सैकंडरी अर वरिष्ठ उपाध्याय परीक्षा रा नतीजां रो ऐलाण कर दीनो है। बोर्ड रा प्रशासक महेश चन्द्र शर्मा नतीजा जारी कीना। बोर्ड रे मुजब वाणिज्य वर्ग मांय 98 दशमलव 95 फीसदी, विज्ञान वर्ग मांय 97 दशमलव 73 फीसदी अर कला वर्ग मांय 96 दशमलव 88 फीसदी विद्यार्थी पास व्हया। तीन ई संकाय मांय लड़कियां रो नतीजो लड़कां ऊं बेहतर रहयो। विज्ञान वर्ग मांय लड़कां रो नतीजो 97 दशमलव 08 फीसदी जद के लड़कियां रो नतीजो 98 दशमलव 90 फीसदी, कला वर्ग मांय लड़कां रो नतीजो 95 दशमलव 80 फीसदी जद के लड़कियां रो नतीजो 97 दशमलव 86 फीसदी अर वाणिज्य वर्ग मांय लड़कां रो नतीजो 98 दशमलव 66 फीसदी जद के लड़कियां रो नतीजो 99 दशमलव 51 फीसदी रहयो। बोर्ड रा सचिव कैलाश चन्द्र शर्मा बतायो के ई साल कला, विज्ञान अर कॉमर्स संकायां रो नतीजो एके सागे ऐलाण करी ज्यो है। वे बतायो के लारला साल री तुलना मांय ई दफा बत्ता विद्यार्थी पास व्हया। नतीजा बोर्ड री वेबसाइट माथे देख्या जा सके है। घणा चौखा नम्बर लावण वाळी कोटपुतली—बहरोड़ री छात्रा खुशी नतीजा ऊं घणी राजी व्ही।

-----  
000

स्वास्थ्य विभाग उनाळा मांय मौसमी बीमारियां ऊं बचाव अर वां माथे काबू करण सारु नियमित जतन करण रा हुकम दीना है। बीकानेर जोन मांय डेंगू रा मामलां ने ध्यान राखता थकां बत्ती सावचेती राखण रा हुकम दिया ज्या है। स्वास्थ्य विभाग रा जनस्वास्थ्य निदेशक डॉ. रवि प्रकाश माथुर आ जाणकारी दीनी। वे बतायो के बीकानेर जोन रा हालात रो राज्य स्तर ऊं नियमित तौर ऊं जायजो लियो जा रहयो है। राज्य स्तर री टीम वठे रो दौरो कर र मौसमी बीमारियां ऊं बचाव ऊं जुड़ी व्यवस्थावां रो जायजो लीनो है। डॉ. माथुर बतायो के मौसमी बीमारियां ऊं बचाव अर वां री रोकथाम सारु कर्मचारियां ने सिखावण देवण रा हुकम दिया ज्या है। ध्यानजोग है के बीकानेर मांय हाल ताईं डेंगू रा 206 मामलां री ठा पड़ी है।

00000

लोकसभा चुनाव रा पांचवां दौरा रा तैत आज छह राज्यां अर केन्द्र रा राज वाळा दो प्रदेशां मांय 49 सीटां परां शांति सागे वोट पड़्या। ई दौर मांय उत्तर प्रदेश री 14, महाराष्ट्र री 13, पश्चिम बंगाल री 7, बिहार अर ओडिशा री 5—5, झारखण्ड री 3 अर जम्मू—कश्मीर अर लद्दाख री एक—एक सीट सारु वोट पड़्या। आज केन्द्रीय मंत्री अर भारतीय जनता पार्टी रा आला नेता राजनाथ सिंह, स्मृति ईरानी, पीयूष गोयल, कांग्रेस रा नेता राहुल गांधी अर के.ए.ल. शर्मा, नेशनल कॉन्फ्रेंस रा उमर अब्दुल्ला अर लोक जनशक्ति पार्टी—रामविलास गुट रा चिराग पासवान समेत छह सौ पिचानवे उम्मीदवारां रो सियासी भाग रो फैसलो इलेक्ट्रोनिक वोटिंग मशीनां मांय बंद व्हे ग्यो। ई बीचे लोकसभा चुनाव रा छठा अर आखिरी सातवां दौर सारु प्रचार रो काम जोर ऊं चाल रहयो है। छठा दौर मांय 25 मई ने अर 7 वां अर आखिरी दौर मांय एक जून ने वोट पड़ेला। वोटां री गिणती 4 जून ने करी जावेला। वोटां री गिणती सारु राज्य मांय ई तैयारियां चाल रही है।

पाली मांय जिला निर्वाचन अधिकारी री सदारत मांय वोटां री गिणती री ड्यूटी वाळा कर्मचारियां अर अहलकारां ने पैला दौर री सिखावण दीरीजी। ई दौरान जिला निर्वाचन अधिकारी गिणती रा बारा मांय विगतवार जाणकारी दीनी।

000

राज्य मांय पड़ रह्या जोरदार तावडा बीचे घणखर ठौड़ां पारो 44 ऊं 47 डिग्री सेल्सियस बीचे चाल रहया है। मौसम विभाग रे मुजब अजमेर, जयपुर, कोटा, बीकानेर अर जोधपुर संभाग मांय घणखर ठौड़ां अर उदयपुर संभाग मांय कठे—कठे लू बाज रही है।

प्रदेश मांय कठे—कठे रात री बगत ई घणी गर्मी महसूस क्वे रही है। जिलां मांय प्रशासन री ओर ऊं लू अर मौसमी बीमारियां ऊं बचाव सारू एडवाइजरी जारी करी ज्यी है। चूरू मांय आखा दिन लू बाजती रही। ज़िला कलेक्टर पुष्पा सत्यानि रा हुकम पाछे आज 88 गौ—वंश ने गौशाला भिजवायी ज्या। झालावाड मांय ई आखा दिन लू बाजण ऊं घणी परेशानी क्वी। चिकित्सा अर स्वास्थ्य विभाग जनता ने परेशानी ऊं बचावण सारू अस्पतालां मांय ओआरएस रा पुड़का अर ओआरएस रो घोळ रखवायो है। झालावाड रा आवासीय विद्यालयां अर छात्रावासां मांय रह र पढ़बा वाळा विद्यार्थियां ने ई ओआरएस पुड़का बांटी ज्या। बूंदी ज़िला मांय घणी गर्मी ऊं बचाव सारू चिकित्सा अर स्वास्थ्य विभाग री ओर ऊं जनता ऊं खास सावचेती राखण री अपील करी ज्यी है। ज़िला मांय लू ऊं जिन्दगी माथे घणो असर पड़यो, हालाकि सिंज्यां री पोर बादळा मेड जावण ऊं थोड़ी साता मिली। बारां मांय ई दोपहरां पाछे क्वी हल्की बिरखा ऊं गर्मी ऊं थोड़ो आराम मिल्यो। मौसम विभाग आज जयपुर, भरतपुर अर अजमेर संभाग मांय कठे—कठे हल्की बारिश रा आसार जताया है। महकमा रे मुजब आवता एक सप्ताह ताँई मौसम मांय खास बदलाव रा आसार नी है।

000

खान विभाग चौमासा मांय राज्य रा खनन हलकां अर दफतरां मांय मोटी तादाद मांय पौधा रोपेला। खान सचिव आनन्दी आ जाणकारी दीनी। वे बतायो के खनन हलका मांय ई चौमासा मांय पांच लाख ऊं बत्ता पौधा रोप्या जावेला। खान सचिव कहयो के हर ज़िला रा वां खनन पट्टा हलकां मांय, जठे खुदाई रो काम बंद क्वे ग्यो है, वठे कम ऊं कम एक खान ने भर र वठे पौधा रोप्या जावेला।

000

राजस्थान मेडिकल सर्विसेज कॉर्पोरेशन 10 दवाइयां रा नमूना अमानक मिलण परां 08 कम्पनियां माथे आं री पूर्ति करण परां रोक लगा दीनी है। आरएमएससी री प्रबंध निदेशक नेहा गिरि आ जाणकारी दीनी। वे बतायो के मुख्यमंत्री निःशुल्क दवा योजना रा तैत दवाइयां री खरीदी अर पूर्ति रा प्रबंधन ने और मजबूत बणायो जा रहयो है।

00000